

IV. KAFLI

13. gr.

Gjaldskrá þessi staðfestist hér með samkvæmt Orkulögum nr. 58 29. apríl 1967, til að öðlast þegar gildi. Jafnframt fellur úr gildi gjaldskrá fyrir Hitaveitu Reykjavíkur nr. 76 4. apríl 1972.

Iðnaðarráðuneytið, 12. marz 1973.

Magnús Kjartansson.

Jóhannes Guðfinnsson.

REGLUGERÐ

**um innheimtu gjalds vegna kostnaðar við framkvæmd laga nr. 102
31. desember 1972 um skipulag á löndun á loðnu til bræðslu.**

1. gr.

Kostnaður við framkvæmd laga nr. 102/1972 um skipulag á löndun á loðnu til bræðslu, þ. á m. þóknun og kostnaður vegna nefndar samkvæmt 2. gr. laganna, skal greiðast af fiskkaupendum og fiskseljendum að jöfnu. Skal greiða 1 eyri af hverju kg hráefnis, sem sem landað er til bræðslu á loðnuvertíð 1973, til að standa undir kostnaði við framkvæmd laganna og skulu seljendur annars vegar og kaupendur hins vegar greiða þessa fjárhæð að hálfu hvor.

2. gr.

Kaupendur loðnu til bræðslu skulu standa skil á greiðslum samkvæmt 1. gr. Hefur nefnd samkvæmt 2. gr. laga nr. 102/1972 á hendi innheimtu gjalds þessa og reikningshald. Verði í árslok afgangur af gjaldi þessu, er ráðuneytinu heimilt að ákveða, að hann renni til Verðjöfnunar sjóðs fiskiðnaðarins, deildar fyrir loðnuafurðir.

Reglugerð þessi er sett samkvæmt lögum nr. 102 31. desember 1972 um skipulag á löndun á loðnu til bræðslu, til þess að öðlast þegar gildi og birtist til eftirbreytni öllum þeim, sem hlut eiga að máli.

Sjávarútvegsráðuneytið, 13. marz 1973.

F. h. r.

Jón L. Arnalds.

Gylfi Þórðarson.

SAMÞYKKT

**fyrir Vatnafélag Hlíðarhrepps og Tunguhrepps
í Norður-Múlasýslu.**

1. gr.

Félagið heitir Vatnafélag Hlíðarhrepps og Tunguhrepps. Heimili þess og varnarþing er Hlíðarhreppur og Tunguhreppur í Norður-Múlasýslu.

2. gr.

Verkefni félagsins er að vinna að því með fyrirhleðslum og öðrum mannvirkjum, að varna Jökulsá á Dal að ganga á aðliggjandi jarðir báðum megin árinna. Félagið getur aukið starfssvið sitt, ef meirihluti félagsmanna er því samþykktur.

3. gr.

Hönnun meiri háttar mannvirkja, sem félagið hyggst ráðast í hverju sinni, skal félagsstjórn bera undir ráðunaut ríkisstjórnarinnar í vatnamálum (vegamálastjóra).

Að loknum framkvæmdum við mannvirkjagerð, skulu þær teknar út af ráðunaut ríkisstjórnarinnar í vatnamálum.

4. gr.

Samþykkt þessi nær til jarðanna: Árbakka, Litla-Bakka, Galtastaða ytri, Hnitbjarga, Hlíðargarðs, Hólmatungu, Eyjasels, Bakkagerðis, Ketilsstaða, Skriðufells, Torfastaða og Hlíðarhúsa.

Nú þykir nauðsynlegt eða réttmætt að bæta við félagsskapinn nýrri jörð eða fella jörð úr félagsskapnum, en næst ekki samþykki aðalfundar, og er þá heimilt að skjóta því atriði til úrskurðar landbúnaðarráðherra, sbr. 76. gr. vatnalaga.

5. gr.

Stjórn félagsins skipa þrjú menn og aðrir þrjú til vara.

Þeir skulu kosnir á aðalfundi til þriggja ára í senn, og gengur einn úr stjórn á ári hverju, eftir hlutkesti fyrstu tvö árin. Stjórnin velur sér formann og skiptir með sér verkum.

Á aðalfundi skal kjósa tvo menn til að endurskoða reikninga félagsins.

6. gr.

Aðalfund félagsins skal halda fyrir lok nóvembermánaðar ár hvert. Skal þar lagður fram endurskoðaður reikningur félagsins fyrir umliðið ár. Fundur er lögmaður, ef helmingur félagsmanna sækir hann. Til samþykktar á félagsmálum þarf einfaldan meirihluta atkvæða þeirra manna, sem á fundi eru og atkvæðisrétt eiga, en til breytinga á samþykkt þessari þarf $\frac{2}{3}$ hluta atkvæða. Heimilt er stjórninni að kveðja til aukafundar, ef þörf krefur, en skylt, ef $\frac{1}{4}$ hluti félagsmanna óskar þess.

Atkvæðisrétt um félagsmál hafa eigendur og ábúendur framangreindra jarða, og gildir eitt atkvæði fyrir hverja landareign.

Til aðalfundar skal boða með viku fyrirvara á þann hátt, sem venja er að boða til sveitarfunda. Í fundarboði skal getið dagskrár fundarins. Formaður kveður til stjórnarfunda, svo oft sem honum þykir þurfa, svo og ef einhver meðstjórnandi óskar þess. Skylt er stjórninni að halda gerðabók. Þar skal rita fundargerðir félagsfunda.

7. gr.

Kostnaði við viðhald og umbætur varnargarða þeirra og annarra mannvirkja, sem gerð verða, skal félagsstjórnin jafna á hlutaðeigandi jarðeignir í réttu hlutfalli við fasteignamat á landi jarðanna og einnig eftir hagsbótum þeim, er hver jörð hefur af fyrirhleðslunum eða öðrum mannvirkjum eftir mati þriggja manna, er félagið kys til þess. Eftir sama hlutfalli skal skipta öðrum árlegum kostnaði. Verði ágreiningur um skiptingu kostnaðar, ber að leggja hann undir úrskurð þar til dómkvaddra manna, og að öðru leyti fer um hann eftir gildandi lögum.

Nú þykir nauðsynlegt að gera ný mannvirki til varnar vatnaágangi, og skal þá jafna kostnaði á félagsmenn á sama hátt, að frádregnum þeim hluta hans, sem kann að fást greiddur annars staðar að.

8. gr.

Formaður félagsstjórnar hefur á hendi umsjón með mannvirkjum þeim, sem gerð verða. Hann skal og halda alla reikninga félagsins og annast greiðslur nema stjórnin hafi skipt með sér verkum á annan hátt, sbr. 5. gr.

Formaður skal í samráði við meðstjórnendur annast um, að gert verði við bilanir svo fljótt, sem auðið er, svo að fyrirhleðslur og önnur mannvirki séu jafnan sem tryggust. Skoðun á mannvirkjum þeim, sem gerð hafa verið, skal jafnan fara fram árlega af þar til hæfum manni, að tilhlutan formanns, og skal hann senda afrit af skoðunargerðinni til ráðunautar ríkisstjórnarinnar í vatnamálum (vegamálastjóra).

Félagsmenn skulu ávallt að öðru jöfnu sitja fyrir öðrum um vinnu á vegum félagsins fyrir verkamenn, bifreiðar og önnur vinnutæki.

9. gr.

Allan sameiginlegan kostnað skal félagsstjórnin innheimta með nægjanlegum fyrirvara. Ef tregða verður á með greiðslur, er heimilt að taka gjöldin lögtaki.

Til þess að standa í skilum með árlegar greiðslur kostnaðar, er stjórninni heimilt að taka bráðabirgðalán, sem jafnan greiðist að fullu á sama reikningsári með niðurjöfnuðum gjöldum félagsmanna.

Vexti af slíku láni má telja með öðrum kostnaði.

Reikningsár félagsins er almanaksárið.

10. gr.

Nú telur landbúnaðarráðherra eftir tillögum ráðunautar ríkisstjórnarinnar í vatnamálum, að nauðsyn sé til umbóta á varnargörðunum eða nýrra mannvirkja umfram það, sem félagsstjórn hefur ráðgert, og skal þá félagsstjórn skyllt, er hún hefur fengið tilkynningu þar um, að láta framkvæma þau verk, svo fljótt sem nauðsyn krefur, ef ástæður leyfa og fé er fyrir hendi.

11. gr.

Nú þykir ráðlegt eða nauðsynlegt að slíta félagsskapnum, og fer þá um tillögur þar að lútandi sem um tillögur til breytinga á samþykkt þessari, sbr. 5. gr., enda staðfesti landbúnaðarráðherra samþykkt um félagsslitin.

12. gr.

Brot gegn samþykkt þessari skal varða allt að kr. 10 000.00 sektum, er renna í félagssjóð.

13. gr.

Með mál út af brotum á samþykkt þessari skal farið að hætti opinberra mála.

Samþykkt þessi staðfestist hér með samkvæmt vatnalögum, nr. 15 20. júní 1923, til þess að öðlast þegar gildi og birtist til eftirbreytni öllum, sem hlut eiga að máli.

Landbúnaðarráðuneytið, 14. marz 1973.

Halldór E. Sigurðsson.

Þorv. K. Þorsteinsson.